

宋學士全集 一七



宋學士全集

(七十)

宋 濂 撰

宋學士全集卷之三十一

琴操

飛泉操

浦陽元麓山有飛泉。濂與鄭源先生數觀之。造飛泉操。鼓之琴。書諸崖石。其辭曰。
飛泉兮瀏瀏。洗耳固非兮。誰飲我牛。覆謂我污兮。移彼上流。具人之形兮。奈何忘人之憂。

琴操二首

余將有遠行。道過雙溪之上。中心隱憂。未能釋去。逢友琴生於麗澤精舍。乃製穹霞、洞林二操。使彈之。流宮含徵。其聲泠泠然。恍如坐青蘿山中時也。生亦清俊士哉。其辭曰。

有穹者霞。其色楚楚。朝宜弋於林。暮汕於渚。役車駸駸。胡弗之休。視波江水。彭然東流。有洞者林。其色陰陰。可以樂饑。可以洗心中。有白雲。藹其承宇。我親之思。我心之苦。

右穹霞操

右洞林操

含山操二解有序

含山操者。爲和陽王綱妻吳貞媛作。貞媛遭兵亂。乃能完節蹈水死。其不有繫民經之大者乎。辭曰。
含山有雲。莫蔽我衣。彼荷戟者。迫我以馳。我馳我驅。泣涕如雨。仰視白日。光不照下。叶地不可穴。天不可緣。含旂含旂。我尙何言。

含山有石其光差差石或可轉我節可虧我夫何之欲從無所舍彼黃泉無相見者叶誰謂淵深我視若陵我死得死中心之事

琴操二首

客有吏於海東者以能擊貪暴聞然終用是受誣嘔血死予友胡徵君爲著哀辭一通予讀之甚悲竊取其意作哀海東傷嫉女二操使善琴者彈而和之客之鬼或有知則其鬱鬱之氣庶幾少伸矣乎辭曰我哀東海而思之苦彼何人斯猛噬如虎我不擊之我民之憂縱不我與覆以我爲仇蒼天雖高冤其有極非血之嘔曷明心赤泱泱大風沈沈寒泉舍旃舍旃我尙何言

右哀海東

有嫉者女顏如舜英詆我以醜我其何傷眩白爲黑古亦多有自尤不遑敢誰之咎黃鵠飛來其音闐闐我心苟安何感弗欣天上地下命也奈何命也奈何焉知其他

右傷嫉女

鼓吹曲

王國祀仁祖廟樂章

迎神奏瀉和之曲

皇圖聿崇茅社受封禮分雖異孝思則同緬懷世德源深流鴻報本有祀式昭神功

奉牲奏慶賀之曲

王國之東清廟翼翼奉我皇祖享祀弗忒薦以牲醴敢曰充牣神其迪嘗純嘏是錫

初獻奏保和之曲

之舞

皇祖載德。既渙且仁。弗耀其身。委祉後人。瞻茲藩服。典祀維寅。清醴方薦。歆其苾芬。

亞獻奏清和之曲 之舞

穆穆靈宮。庭燎有煒。貳觴載升。神其樂止。其樂伊何。錫我繁祉。磐石之宗。本支百世。

終獻奏成和之曲 之舞

神兮下臨。陟降在庭。不見其形。如聞其聲。冷風肅然。達於兩楹。禮成三終。神保攸寧。

飲福奏咸和之曲

神具醉止。威儀孔肅。曰爾孝孫。來飲爾福。介爾眉壽。膺爾百祿。子孫保之。以引以續。

徹豆奏嘉和之曲

禮備樂舉。祀事攸宜。孰其尸之。廢徹不遲。皇哉神惠。覃及我私。靈氛將逝。如何勿思。

送神奏德和之曲

杳兮忽兮。神運無迹。鸞馭上征。星流飈疾。其靈在天。其主在室。億萬斯年。孝思無斁。

宋饒歌鼓吹曲

臣聞真人應運而起。旋陰轉陽。協和神人。剋革僭僞。期底隆平。於時五季之亂已極。光嶽氣分。河海怒溢。強臣悍將。割土分疆。擅執節鉞。倒持天柄。敢拒帝命。莫之敢制。我太祖躬屬囊韃。奉命四征。赫聲濯靈。所向輒克。姦惡授首。獻於太廟。已而大功既茂。天命攸歸。乃受周禪。卽皇帝位。璽書誕頒。天日昭煥。凡厥臣

庶莫不翹足延頸。以俟太平。皇帝若曰。皇天既畀我有家。朕夙夜曷敢荒寧。彼蜚蠊之微。僅若一髮。欲抗明於日月。疇能置諸脫。當翦其孽芽。毋使滋蔓。爾有衆尙克協乃心。以底天之爵。越建隆元年夏五月丁巳。上親征澤潞。六月辛巳。克其城。李筠赴火死。冬十月丁亥。又親征淮南。十一月乙未。薄其城。未幾拔之。李重進亦赴火死。乾德元年春二月。高繼沖遣客將王昭濟奉表稱臣。而荆南平。三月壬戌。王師入朗州。獲周保權以歸。而湖湘又平。三年春正月。取劍州。蜀主孟昶封府庫以降。開寶三年秋九月己亥朔。伐南漢。四年春正月辛未。次白田。其主劉鋹素服出降。七年冬十月。王師伐南唐。八年冬十一月乙未。李煜奉表納降。由是天威所加。如雷如霆。有觸之者。靡不殞滅。太祖既棄羣臣。上游帝所。太宗嗣厥大寶。駿惠前烈。文綏武戡。唯日不足。太平興國三年夏四月己卯。平海節度使陳洪進以漳泉二州獻。五月。吳越王錢俶復盡獻其國所有地。四年春二月甲子。上親征太原。夏五月甲申。北漢主劉繼元率其官屬銜璧入朝。自是海內羣雄皆爲臣僕。風氣宣通。罔有限域。東西幅員盈三萬里。梯山航海。獻寶奉琛。委蛇而來。上實天府。戴白之叟。垂髫之童。皞皞熙熙。莫知帝力。於是宋興至是已二十年矣。臣惟帝王之興。自有貞符。歷古以來。史不絕書。我太祖之生也。祥光瑞彩。流爲精英。異芳幽馥。鬱爲神氣。所居之地。紫氣隨之。建纛而出。白日爲暈。是蓋上天著厥嘉貺。以流耿光於無窮。故自唐虞禪受之後。鮮不以征誅而得天下。其中豈無揖遜而紹位者。皆陽予陰奪。尋卽廢之。惟我太祖應乎天而順乎人。陳橋之戴。黃衣之加。蓋迫於甚不得已爾。由是能大一統。臣服四海。用作神主。聖德神功。巍巍堂堂。傳至孫子。億萬斯年。跨漢唐而追三代。

何其盛哉。然而短蕭鐃歌。黃帝岐伯所以建威揚德。風勸敵士者也。周制因之。其在大司樂。則王師大獻。乃令奏愷樂。在大司馬。若師有功。則愷樂獻於社。大抵皆軍樂也。古樂久已亡失。至漢有朱鷺等十二曲。列於鼓吹。謂之鐃歌。今尙可考見。自時厥後。代有其辭。而唐柳宗元獨準漢曲。倣其篇數。作鼓吹鐃歌。以紀高祖太宗功德及征伐勤勞之事。臣雖不佞。自幼以文字爲職。輒取法漢唐。窮思畢精。作爲歌辭。以侑戎樂。治兵振旅之際。得於馬上奏之。焜耀鏗鏘。震撼無際。使有宋之成烈。增光於後。無讓於前。臣死且不朽。臣謹冒死上。

太祖生洛陽甲馬營中。神光滿室。有香郁然。經宿不散。此聖徵先見者也。爲啓聖徵第一。
啓聖徵兆載先。炎精降。爛以鮮。破重陰。爛層元。合之暢。神必宣。應昌期。馭宰權。天序叶。地軌甄。星游渚。白帝延。氣貫月。永殷年。質往牒。無不然。惟皇符。熾且騫。著成烈。在不刊。

右啓聖徵曲凡二十二句。句三字。

太祖將北伐。師次陳橋驛。諸將以黃袍加上身。列拜庭中。稱萬歲。遂詣崇元殿行禪代禮。爲受周禪第二。

受周禪。崇靈基。飛龍柱。天黃道。開躬握乾衡。鎮坤機。蒼精喪。木無支。黑光盪。日見重輝。天人同。歷數歸。靈承帝祐。流鴻滋。嘉瑞章。紛若敦。神爵集。肉角來。氓灝灝。俗恢恢。昭皇威。時赫戲。

右受周禪曲凡二十二句。其十八句句三字。四句句四字。

昭義節度使李筠據澤潞弗服。上御六師平之。爲斬老雄第三。

斬老雄。雄勢蹙。連寇師。樹高纛。襲邊城。施蠱毒。王赫斯怒。誓如戮。百萬貔貅。若林蟲。行視曠。曉勝平陸。升城齊呼。山嶽覆。飛矢貫臂。拔其鏃。雄斯窮。昇炎燄。朱鳥鳴。反舌縮。反舌縮。四海服。

右斬老雄曲凡二十二句。其十七句句三字。五句句四字。

淮南節度使李重進不庭。憑恃江淮。招集亡命。上親討之。爲長淮沸第四。

長淮沸。沸若湯。有蛟下潛。石作房。腥沫旁灑。矛距四張。欲鼓孽浪。浸日光。眞龍出。火鬣明。炳暴髓。焦毒吭。殲厥凶醜。如刺狼。水安流。若鏡平。皇威洽。口濺滂。建萬寓。慶無疆。

右長淮沸曲凡二十句。其十五句句三字。五句句四字。

上遣將討張文表。假道荆南。其主高繼冲懼。奉表稱臣。爲耀靈威第五。

耀靈威。奄八賁。如山壓卵。颺噓塵。大帥率師。手握瑾渠中切。策馬飲江。江水渾。盪摩日月。搖星辰。孰敢好命。誠以狗蠻荆。輿櫬稱妾臣。翦拜柯條。別其根。一朝坐鎮。百粵門。南荒帖帖。絕妖氛。

右耀靈威曲凡二十句。其十一句句三字。九句句四字。

師克南平。趨朗州。武安節度使周保權拒命。討獲之。爲鷹之揚第六。

我鷹之揚。於彼南楚。目城無全。尙何有險阻。周悒悒。曾莫搆思。仇孽旣殄。胡反噬我師。梟騎厲。華旄旋。海水立。霄旭昏。殺氣回薄。蔚若烟。濯征斯克。功無前。王度遠引。靡不肩。

右鷹之揚曲凡十八句。其七句句三字。九句句四字。二句句五字。

諸將伐蜀。取劍州。蜀主孟昶封府庫請降。爲巴蜀平第七。

惟彼巴蜀。務靡麗以夸。金塊珠礫。納政於邪。於鑠王師。如虎如彪。攘夷凶族。使民氣以據。足不加首。臂豈大於股。啓關迎降。崩角無敢後。聲明宣流。被區有百蠻來同。孚至理。上鄰三五。皇德羨且阜。

右巴蜀平曲凡十八句。其二句句三字。十一句句四字。五句句五字。

南漢劉鋹據嶺南。良將征之。鋹教象爲陣以禦。我集勁弩射之奔。鋹遂詣轅門降。爲象斯奔第八。象斯奔。擴南爚。開重昏。揭兩曜。通粵海。接閩徼。象初弗知。跳踉以戲。敢持厥轂。雖鬪與隼俱。力索氣銷。始就縛。三早凱旋。奏戎樂。威神出自天。顯彼帝畧。千秋萬年。蒸庶和且延。

右象斯奔曲凡十八句。其八句句三字。七句句四字。三句句五字。

王師伐江南。江南主李煜降。時彗出柳。歷輿兒。爲彗出柳第九。

維彗出柳。六合布新。矧此彈丸。何敢不臣。彌弓宛轉。鐵騎參潭。天塹未度。已無江堦。帝詔將臣。俟其來賓。慎毋疾擊。以病吾民。長蛇成圍。不異祥麟。虜王旣降。市無驚塵。大宣皇化。覃於至仁。

右彗出柳曲凡十八句。句四字。

太宗旣繼大統。平海節度使陳洪進獻漳泉二州。爲拓閩關第十。

閩關屹南紀。上應牛女星。南將窺瘴海。東或帶滄溟。五季失羈御。藩鎮擅甲兵。太阿旣倒持。僭竊瀆恆經。

誰歟據二州。於此建節旌。予奪自己出。況復望來庭。太宗嗣寶符。渙號風霆行。稽首歸厥命。覆冒仰王靈。鞮譯通絕域。珪贊集明廷。神猷杳難測。穆穆臻泰清。

右拓閩關曲凡二十句。句五字。

吳越王錢俶。見上威德日盛。盡獻其土地。爲吳越歸第十一。

皇王握神契。重華叶帝蕃。神兵從天下。歟忽千萬餘。揮戈日爲回。投鞭海成枯。奮擊八極閒。健疾飛電如。錢氏最先覺。方物久內輸。終知喬嶽尊。丘阜欲何須。登民獻天府。不煩神戈誅。帝德統罔極。萬國混車書。右吳越歸曲凡十六句。句五字。

海內咸臣。唯北漢假息湯釜。上親征之。其主劉繼元。素服紗帽。待罪臺下。詔釋之。爲克戎逋第十二。汾晉十萬甲。數葉僧爲君。蟠根欲弗拔。毒虐我蒸民。聖人據武師。威烈赫然振。刀戟夜生火。出入動若神。方將藏下地。習已凌高旻。有城皆作醢。無甲不爲塵。戎逋膽已落。舉族悉來臣。羣氓如流魚。挈置瀛海津。自茲遂生育。陶然履太淳。阪泉著軒德。母浦明堯勛。赫赫炎德殷。永世同不泯。

右克戎逋曲凡二十二句。句五字。

四言古詩

風樹亭詩有序

風樹亭者。嘉禾潘孝子之所建也。孝子之親歿。每對人言。輒嗚咽流涕。然無以寓其罔極之思。取韓詩外

傳樹欲靜而風不止之言。表其墓亭。嗚呼。孝子之意。至是爲可悲矣。夫人孰不欲養其親。親則不子待也。所以昔者皋魚立泣而死者。孔子蓋傷之也。憫之也。以其志爲可悲。而無所用其力也。嗚呼。若孝子者。念念不忘乎茲。其亦知沒齒慕親之道哉。爲之詩曰。

山有嘉樹。油然發榮。豈不欲靜。風撓之鳴。我思我親。顏貌日改。子欲養之。親不子待。嗚呼噫嚅。我懷孔悲。山高海深。孰堪喻之。內而九藏。外而四體。皆親之枝。同一根柢。根旣撥矣。而枝獨存。夙夜哀號。莫達九原。白楊蕭蕭。泉扃夜闕。我親我思。得無顛顚。親不可見。音容是求。求之不得。血淚交流。作亭墓隅。是曰風樹。仰之瞻之。心焉孔瘁。

右詩八章。章四句。

靈槐詩有序

四明史氏。貴富光榮。與南宋相終始。非特人事也。蓋有天道焉。元有國百年。史氏以忠信文學稱於時者甚衆。而祿位弗稱。人事不宜然也。是亦有天道焉。元季兵亂。槐生於史氏之庭。史氏里人曰。是必有異。旣而槐死於馬。里人又曰。是必有異。未幾。槐果復生南園中。里人曰。前之異者徵已往。後之異者將來徵之。史氏殆有顯者乎。入國朝。史氏諸孫靖。可以才見推。爲中書舍人。出爲泰州守。遷肇慶通判。前之言者曰。是其徵矣。然而未也。遂相與字槐曰靈槐。而歌咏之。靖可嘗與余兒璉同官。謂余宜賦詩。嗚呼。天人之際遠矣。觀於史氏。又何其著明哉。詩曰。

難諶惟帝。厥命孔赫。鑒於九有。顯相有德。先宋九君。旣南而徵。微不遂傾。世臣毗之。世臣之家。鄧山之下。歲時來歸。旗節車馬。馮軾而趨。袞衣珮璫。其綬伊何。將相之章。雄城渠渠。黎庶如雨。相臣戾止。耄倪咸喜。豈無公侯。孰能後昆。三相二王。國存與存。誰其尸之。其德有始。旣受多祜。又有孫子。鉅海湯湯。朔風荒荒。不淪於危。不顯其光。孰云舊播。而不有穫。天將昌之。嘉徵允灼。崇堂有庭。其左有槐。匪植而生。惟德是培。天實培之。或戕於人。人力雖勞。其能勝天。南園廡廡。有萌斯蘖。其本如達。靡有摧害。始軋而卑。忽拔而穹。其兆斯何。宜卿宜公。明明天子。俊乂是使。矧茲世家。王公之嗣。嗟爾君子。天休汝膺。何以占之。靈槐在庭。贈閻希曾參政山東詩并序

國朝以魏晉以來。立行臺省於外。蓋爲征討權宜之計。至唐末。方鎮擅地。遂以中書令同平章事命之。至今相沿而不革。非所以示悠久。乃改爲承宣布政使司。設使一人。左右參政各一人。以協和庶政。統馭人民。河南閻希曾。由鄉貢進士。擢爲起居注。皇上愛其才俊。俾肄業文華堂。堂在禁中。車駕時幸。臨訓飭之。尋除監察御史。轉司文監令。乃授山東承宣布政司左參政。希曾名鈍。仕學兩優者也。因其嘗受經於予。故其行也。詩以贈之。其詞曰。

山東鉅藩。統府惟六。民物阜蕃。土地饒沃。宸衷軫之。百司棊布。誰挈其綱。政乃無斁。乃詔近臣。爾鈍爾往。宣朕至懷。參佐其長。臣鈍曰吁。臣恐弗勝。方嶽重鎮。厥任匪輕。帝曰俞哉。爾毋固辭。精白一心。力行無疑。鈍拜稽首。卽日啓行。君臣一心。共底隆平。我知閻子。有學有文。五色煌然。出類超羣。子之往矣。其建功勳。

佇見政績邁於古人。古人有云。盡瘁國事。子尙勉旃。服之毋忒。

五言古詩

雜體五首

丹桃艷陽質。移自武陵源。柔風拂纖條。鮮澤沃靈根。吐葩當春茂。結實俟秋蕃。盈盈大如罌。有色極華丹。衛之不敢褻。期以奉君餐。君餐發靈和。神滋生玉顏。無爲升玄化。恭默卽軒轅。效陸平原

流幻百年中。有如水中泡。虛形本不實。何能永今朝。悟此造化意。肆情常逍遙。夜來新雨至。南園秀芳苗。

掇之薦美酒。冲懷正陶陶。斜川素心人。叩門約遊遨。相攜步迴澤。神與品物交。驚颺亂陵蟬。墜照落巖猿。

歸來枕肱臥。遐思遡沔寥。黃唐不我逮。緬焉心煩勞。效陶徵君

竹死不變節。蕙焚尙餘馨。秉性有恆操。

徒計切

物非至情。左崦結層構。中園穿空冥。井花遙上白。嵐影時

獻青。策竈試丹訣。濡毫澹酒經。一爲纓笏累。殊嗟神府局。事去慮將澹。感來心已醒。薨薨哀飢薦。累累嘆

凍蠅。逝將命脩駕。薄言旋故垌。輟穰澆陽卉。泛碧破陰萃。觀化驗羣品。褰襟咏三精。情素諒已展。爵服吾

何營。效謝臨川

周庭體王國。漢制建神區。環極法北辰。元筴應蘿圖。綺殿祥飈轉。丹闕寶氣浮。象魏壓輦道。獸環銜金鋪。

宮花錦隊展。御柳翠鑾圍。長生臨宇縣。億載握皇符。琛贄九夷集。梯航百蠻輸。天開睿情懌。道洽臣節孚。

奉觴鵷鵲殿。奏疏承明廬。元功在獻替。昌言列都俞。殷勤宣大雅。持用補嘉謨。效顏特進

少年趨京洛，京洛多繁華。迅河日流駛，崇芒鬱巖峩。宛馬游龍行，文軒流水過。晨夕騁般樂，張筵陳綺羅。觀禊濯會澗，行酒上陽坡。宛轉七盤舞，繁環北里歌。中有巖棲士，如同顏闔家。尋雲因翳木，飲寶卻寧蘿。時盼城關中，流塵深如何。自咤逸德殷，頗興賢達嗟。及時不行樂，長有好容華。效鮑參軍

韶光將暮芳事未經託物念時濡毫成句

入春已三月，不見曜陽葩。有足限戶闕，而能擗物華。芳林僅只尺，轆車日來過。縞李感明雪，頽桃凝崇霞。焱開通鶯使，暉媚促蠶衙。要友具嘉游，豈乏玉鼻騶。鈞白出川曲，采綠向層阿。行樂固云得，將軍猶枕戈。

憶山中

平生絕俗尚，幽期在一壑。銜卮周曲汜，班坐蔭蘭薄。日燭花欲笑，風迅燕飛弱。疏峰挺飛壺，平楚下飢鶴。厓傾石似行，澗折泉如約。何時脫塵鞅，賦歸臨樓屬。

浩懷

漆園欲齊物，伯陽期守元。脩軌務絕絆，沖志在潛淵。夕陰冥蕙幌，晨陽煖石田。外膠一以遣，澹泊返自然。五圖非謬記，九籀有真詮。青青林閒雨，勃勃谷竇烟。松華行將熟，采之釀紅泉。

古辭四首

步月空塔下，蟋蟀逼人啼。急扶叩竹柱，行過畫樓西。登樓望南山，山峰如髻丫。西頭雲起處，定是故人家。

誰家採蓮女。面如玉盤。相對悄無語。風吹荷葉翻。
曉行秋川上。無奈秋色何。芙蓉雖堪折。卻愁零露多。

靜室二首

靜室似僧廬。絕與黃塵隔。引雀喜留黍。惜苔懶穿屐。有時倚幽軒。情境一何寂。只有巖花飛。隨風亦無迹。
明月出東山。照見西林明。龍蛇布滿地。欲步還自驚。試問夜何其。鳥喧似知更。誰探千載意。寂默乃其情。
題亭上壁三首

意隨流水行。卻向青山住。因見落花空。方悟春歸去。
花飛豈解愁。愁之損年華。請觀未蕊時。何處得飛花。
山花招客笑。山鳥喚人鳴。相逢本偶爾。花鳥亦何情。

古曲

思君不可見。忽見堦下花。此花君手植。如見君容華。嫣然索予笑。不語意自佳。花容方窈窕。因君愈妍好。
見花情尙多。見君將奈何。

曉行

荒鷄一再號。驅車事晨征。寥寥秋風肅。況此華月明。萬頃琉璃中。着吾一身行。肝膽盡冰雪。毛髮亦含清。
超然鴻濛初。頓覺百慮冥。安得王子喬。爲言此時情。

始衰

四時相推斥。行年五十過。觸心苦無惊。況復值春華。良節足游衍。逝齡翻成嗟。蹙眉拭花露。按愁聆禽歌。氣索怯縮風。顏凋仰流霞。倚林思寢榻。躡坡企行車。志士惜墜景。達人傷逝波。寧不動靈襟。潛然下涕多。人生大化中。飄蕭風中花。百年終變滅。感慨欲如何。

寄遠曲

淚盡愁難盡。燕歸人未歸。遙知君念妾。似妾憶君時。其一憂心不可寫。天際望歸舟。江長望不極。更上一層樓。其二妾有五字詩。寄君君勿忘。十朝成一字。字字九回腸。其三關河勞夢魂。欲見杳難憑。照君文繡帳。相近不如鐙。其四

遣興

鶉衣皆惡顏。章絨無醜容。容顏未嘗異。人心自不同。西鄰起高樓。妖冶街春穠。玳筵陳圓方。朝暮雜歌鍾。東家席爲門。著書述軒農。豈能望膏粱。糠覈亦不充。一門軒蓋集。一門蠹罔空。是非千載定。奚惜達與窮。

川上夜坐約王子充同作

四山動暝色。紅日下蒙翳。川光生夜明。一白欲無地。星斗可俯拾。恍疑青天墜。曠景與心涵。直接溟滓際。若非隔林鍛。不知有人世。

病懷

人生老須至。在我不敢辭。老人多壽康。我胡病擾之。一從嬰弱疴。筋力漸告疲。凌晨頻攬鏡。且復傷鬢絲。固知非金石。難可百年期。如何未五十。摧塌已不支。豈非蒲柳質。望秋輒先萎。歷觀宇宙內。氣化相推移。試求古賢豪。存者今爲誰。當知事必爾。奚以嗟嘆爲。兒童種旅葵。芳葉正參差。南風一披拂。流光一生輝。玩之百憂忘。濁醪聊自持。

望鍾山作簡周先輩有序

春旭載和。鍾山在望。道光泉之嫩碧。宜嘯。朱湖洞之飛丹。可尋。爰憶舊浙。輒形新咏。不慚下側。以豔高情云爾。

鍾山宛如沐。繡纈孕春饒。生黃歸灌棠。駭綠亂陵苕。谷沸桃雀集。飈迴川景矯。茲今愧畜軫。宿昔憶聯鑣。陟峻鼻生火。酣芳臉帶潮。詩情霞閒迴。酒纈望中銷。偏憐晴蘿思。長麗涼月宵。文園病渴吻。沈生減圍腰。江表周公子。華采雙鳳翹。逸興如過舉。相隨插鞠苗。

題方方壺畫鍾山隱居圖

余十年不作詩。見方壺子此圖。不覺逸興頓生。會仲修求題。忻然命筆。第塵土襲人者久。殊不能佳耳。詩曰。

飄飄方壺子。本是仙者倫。固多幻化術。筆下生白雲。白雲縹緲閒。拔起青嶙峋。似是朱湖洞。笙鶴遙空聞。豈無許飛瓊。烹芝噏華芬。鍊師從何來。面帶山水文。相期守規中。結庵在雲村。心游帝象先。神棲太乙根。